

Үр Савченко үгән өгчәнә

1957 джилд хөөдәннег чигн гару угагъар үвләс гаргънав, 100 хөөнәс—115 хургъ авнав, хөн болгънас 5,5 килограмм ноос авнав гидж бичгдсн социалистическ даалгъвр хөөчин герин эрсд өлгәтә бәәнә.

Эн Приютненск района Кировин нертә колхозин 4-ч бригадин ах хөөч Данил Демидович Савченкон авсн даалгъвр, Дөчн джилин эргцд хөөнә ард дахдж йовх цагт Данил Демидович хө ягъдж асрдж өсгдгиг болн гемтад одсн цагт ямаран эв-аргъар эмндж эдгәдгинь дегәд сәәнәр меднә.

Тегәд чигн эврәннь хәләдж йовх 631 толгъа хөөгъән давсн үвл нег чигн гару угагъар авч гарсн деерән, 100 хөн болгънас—121 хургъ авч, даалгъвран күцәв.

Хө өлсггъиг болн ноос гаргългъиг цааранднь ясрулхин туск КПСС-н Центральн Комитетин болн СССР-н Министрмүдин Советин бичгт болн Н. С. Хрущевин йөрәлд байрта кевәр хәрү өгч, хөөдән үвләр хургълуллгъна кергт оданас авн белддж, өрүн-асхнд, зәрмдән сөөнъ дуусн чигн хәрүлдж, үдин халунд амрадж, хөөдән таргълулдж йовна.

Үвләр болн эрт хаврар гарсн хургъдт кергтә кошар, дулан хаша яслгъна көдлмш кегдджәнә. 100 хөн болгънас—117 хургъ авх, хөн болгънас 6 килограмм ноос авх даалгъвран күцәхин эркд, хөн болгънд 3 центнер өвс, 1,5 центнер силос болн 60 килограмм ош-зүсн буудән умш белддж авхар зүтгдж йовна.

ЭЛЬДАН ЭРДНЬ.